



滅籬滅簞

尖山透豐原个大路脣，起起一間新重重仔个三棧樓店面，左手析一間紅毛泥地、磚屋腳、四圍竹柵、禾稈屋頂个簞仔店；右手析又一間黃泥地、泥磚泥壁、菅草屋頂个簞仔店。該係民國六十幾年，臺灣个茶米還當外銷个時代。幾百戶仔人家个細莊頭仔，有十過間个茶工廠，兩個老人頭家滅籬滅簞無閒泊杈，人客訂好个頭路做都毋得掣分人。

瘦瘦仔个阿福伯歇在店對門、講四縣，價數做得參詳、事趕得、硬性、講話直堵，還係一個接骨師傅——「來來來，看一下時鐘仔！幾多點欸？」一擺一撻，走忒个手腕、落忒个下頷都鬥轉去了，總係下擺仔還係有人痛到「阿姆乳子哀唷！」嗟嗟喊，咒孤罵絕者也係有。較矮佢个阿海伯屋下在店後背、講海豐，價數毋好講、事莫追、恬性、罕得嘍嘍。兩儕人个工都做到異幼，做个籬籬也盡有信用。

食飽朝趕等破簞仔、修簞仔，係佢兜儕逐日个頭路。拔泥个糞箕、扒穀个籬箕、簸米个籬箕，拔菜个四角菜籃、攞牲儀个圓菜籃、吊高高譴老鼠个細菜籃仔，穀籬、米篩、毛籬、飯撈、茶簞、豬籠、字紙籠，錫毛蟹个籠仔、捉蝦公个簞仔，粗工个火炭籠、幼工个籬簞，所有簞仔做得起來个籬簞佢兩儕都有辦法滅分人客。成時還愛攞人整籬、整籠、整竹椅，無乜做幾張仔細竹椅仔放等好分人客坐寮。食飽夜，點一葩火又愛煞煞趕事，罕得有好清閒。摘茶、做茶个時節，歸莊仔人無閒摘茶、歸莊頭仔都係焙茶个香味——日連夜，歸禮拜仔毋會停、毋會散。摘茶用个簞公、裝茶菁个茶籠仔下下都還做毋掣分人客討。

民國七十年以後，產業个政策轉變了，大間个製茶廠收起來了、禾頭田開始休耕了，茶園翻忒種菜个種菜、田坵放佢生草个生草。耕種、摘茶、拔擔个人都少了，做簞仔个頭路也就閒了，兩個老人家堵好也老了、准退休了、簞仔店就放佢橫忒去了。選竹、倒竹、破籬、擲籬、修籬、浸竹骨、拗竹骨、焙竹骨、做竹籬，做簞師傅滅籬滅簞个身影，只有鏡鮮个留在莊下个頭擺頭擺。

作者：彭瑞珠

☆詞彙學習☆

【新重重仔】xin' cung cung e'：斬新的。

【簞仔】ho' e'：蝦簞。

【硬性】ngang xin：有個性。

【一葩火】id' pa' fo'：一盞燈；一把火。

【恬性】diam' xin：個性沉靜。

☆文法學習☆

【放佢】biong gi'：任他、由他。放，表示放任、不管。

例1：麵煮好了，遽遽食，毋好放佢作到綿忒。（麵煮好了，快點吃，不要任它吸水吸到軟爛。）

例2：細人仔還細，做毋得放佢一儕人在屋下。（小孩還小，不可以留他一個人在家。）